

- 35 Thu lógnis min zi uuáre, er hinaht háno krahe,
 in nótlíchemo thínge, er thaz húan singe:
 Lógnis thrín stunton mit thines selbes uuórton
 (gihúgi uuórtes mines) thes héreren thines.
 Zi spéri irquam er hártó súlícheró uuórto:
- 40 tho spráh er uuórton héizen, thia kúanheit uuolt er uuéizen:
 'Drúhtin min ginádig, thi fh es uuurti uuírdig,
 mit thionostu ih biuuúrbi, thaz ih mit thír irsturbi:
 Thaz suért ni uuari in uuórolti so hartó bízenti,
 odo ouh spér thehein so uuás, thaz ih rúahti bi tház;
- 45 Uuáfan ni uuári, thaz ih in thiu firbari,
 ni ih gabi séla mina in uuéhsal bi thia thína;
 Ther fiant io so hébiger, then ih intriati thiu mér,
 thaz mih ío ginotti, theih thin firlóugneti.
 Sie sprachun álle, so man uuéiz, so sámalichan úrheiz:
- 50 bihiazun sih zi nóti thera selbun kúanheiti,
 In sélben thaz ni hángtin, thaz sie imo ío giuuuangtin,
 thehéin thes müate horti in súlícheru nóti.
 'Níst er', quadun, 'tháre, ther ío thih so irfáre,
 gisúnten uns thír dérien: uuir uuóllen thih in uuérien!'

29. XIV. Iubet ut cui desit gladium emat.

- 'Thánne ih', quad er, 'sánta, in min árunti iuih uuánta:
 uuard iz iouuánne, thaz brústi in uuíhtes thánne?'
- 'Ni uuérd iz', quadun, 'drúhtin, ni uuir fúarin mit ginúhtin:
 thoh unser nihéin uuíht drúagi, thoh hábetun uuir ginúagi.'
- 5 'So uuer sékil', quad er, 'éigi, ni sí imo in thiu ginúagi,
 uuanta iu nu nót uuírdit, neme thia dásgun tharmít.'
 Gibót er tho in then nótin thaz sie sih uuánotin,
 thaz nihéin thes fártes tho thárbeti thar suéertes:
 So uuélih so iz ni hábeti, gibót er, thes gizíloti,
- 10 er úmbi thaz in gáhi thia dúnichun gigábi:
 'Thaz héilege ío girédotun, ouh búah fon mir giságetun,
 íoh fórasagon zéllent, thio zíti iz nu irfúllent.'
- 'Drúhtin', quadun se sár, 'uuir éigun zuei suért hiar
 nu zi thérera frísti in thina fóllusti.'
- 15 'Ginúag ist thár', quad er zín: 'thiu mugun úrkundon sin,
 thaz uuir in mugun uuérren, in thiu uuir tház uuollen:
 Nóh ni tharf man zéllen, in thiu uuir tház iruuellen,
 ni bunsih uuáfan nerien, gístén uuir unsih uuérien.'

37 Lougnis uuornton 38 gihugi 39 spéri uuorto 40 sprach heizen 41 tháhes (thi: fh es, *rasur von u, V*) 44 bi thaz 47 mer 48 ío ginótti 51 simo 52 hórti noti 29, 2 iouuanne uuíhtes thanne 5 sí imo 6 neme tharmít 7 sie 12 zéllent 14 frísti 15 thar zí in 16 thiu 18 bi únsih.